

1597 etagatam, trans amnem Lanternam traditurum; ni sufficient, Bagnacavallum, & Cotiniolam daturum; Lugo quoque in finibus sito, licet ægre in id descendat, cessurum: vicissim tantum reposcere, ut quidquid inter Sanctum Albertum, ac Primarium situm esset, ad Comacini aquas arcendas tribuatur; vel aggeres obicesque ad earum incrementum atque impetum repellendum opponere permetteretur. Connubiis quoque allicit, ut nempe Joannis Francisci Aldobrandini nata filio jungatur; ea affinitate beneficii jure iisdemmet locis potiri posse ratus. Demum, ut coram minime suspectis iudicibus causa agatur, flagitat: eodem tempore de concordia utilius majori cum dignitate, absque Pii V. diplomatis derogatione, tractari posse. Scripto Montecuculus postulata adnectit, ne e Reipublicæ ditionibus arma extrahi, neve pontificias copias per Venetos fines transire Senatus permittat: eadem se ab Insubrum gubernatore petiisse, neque alienum ab iis concedendis offendisse. Responsum est, opportunum eo tempore Senatum non censere, ut quidquam sigillatim decerneretur; de propensa Reipublicæ voluntate Cæsari nullum ambigendi locum esse; nihil de iis, quæ postulet, statui posse, quin Patrum fidei in negotio pertractando derogetur.

Delphinus de his omnibus certior factus, Clementem ad concordiam adducere summa ope nititur; ineundæ pacis leges proponit; quibus rejectis, tandem in hoc Pontifex persistit, ut, Ferraria ab Estense relicta, tum demum res agatur: Giliolo ejus oratori iudices postulanti eadem obijciuntur, ut facile appareret, arte a Clemente tempus extrahi, quo Principum animi in ambiguo hærent, Cæsaris constantia frangeretur, atque interea ipse, quæ ad expeditionem necessaria forent, compararet; copiis Ferrariam appropinquantibus, populum anathemate perterritum tumultuaturum, atque palam, Cæsare relicto, Ecclesiæ accessurum, existimans. Anconæ interea Antistes Venetias pervenit, atque una cum Amerino Episcopo, Pontificis legato, collegium ingressus, ut Senatum ab ope Estensi præstanda averteret, in hanc sententiam est locutus.

Anconæ
Antistitis,
Pont. legati,
ad Venetos,
oratio.

Si quis, Princeps Serenissime, Patres optimi, a Clemente octavo multa, eaque præclara & eximia in pontificatu gesta intue-